

DISCOURS DE L'ESTOC

Et genealogie des comtes de Vintemille, Paleologues et Lascaris, par
le sieur de Vintemille, conseiller au Parlement de Bourgogne.

A Monsieur POPON,

conseiller au mesme Parlement.

Plusieurs se sont plaincts à moy de moy mesme, et vous plus que nul autre, tresfidele et cordial amy, de ce que i'ay voulu vivre jusques à present comme en tenebres en ma maison privée, me contentant d'un mediocre estat en honneste pauvreté, sans aspirer aux dignitez et faveurs de Cour, et encores plus que ie n'ay fait cognoistre en public le lieu et la race dont ie suis sorty et les gestes vertueux dont mes maieurs se sont faits grands et remply leurs maisons de biens et d'honneurs, subiets, clienteles et amys. Vous m'avez maintes fois remonstré que les biens temporels, faveurs et marques de fortune ne nuisent point, ains aydent aucunement en la felicité que l'on cherche 'en ce monde selon la tradition des Peripatetiques, et que l'obiet que l'on se propose devant les yeux d'ensuivre la trace de ses maieurs, incite grandement les hommes aux belles et loüables entreprises ; à ce propos vous m'avez amené l'exemple et l'autorité de ce grand Themistocles, lequel disoit que les trophées de Miltiades ne le laissoient point dormir et lui donnoient un merveilleux aiguillon au desir qu'il avoit de se rendre illustre et chercher une pareille ou plus grande louange ; que i'avois par experience cognü que le peu qui en estoit venu à la notice des grands de la noblesse